

ինչպես Լեռնային Ղարաբաղում, հայ վարպետների ձեռքով: Շենքը նրանց մեջ ունի միայն ղարաղամ անունը: Մասերին տալիս են տարբեր անուններ, այսպես, Գեղի թրքաբնակ գյուղում — սյանը՝ դիրւմֆ. արնաբարին՝ դիրւմֆղաշ, առաջին հարկի հաստ գերաններին՝ քիգ, մնացածներին՝ միլ, ծածկի համար կիսագերաններին՝ տրլակօնէրին՝ դօշամա. սրանց վրա գալիս է քախտա՝ փարդու, ապա ջարջ՝ ծղոտ, բաշա՝ յէրթիկ, հո՛ւրթ, հէրթ, պատրհան՝ քախնա, օշախ՝ պաղ, ծըլֆատէղ՝ յուֆայ—աղաշ:

Հացատօնի ներքին կահավորումը, որը կրկնվում է նաև բրատակի մեջ, ավելի քան պարզ է: Կարևոր նշանակություն ունի քօրէնը, որը սովորաբար շինվում է հացատօնից դուրս, հաճախ սրահում և նույնիսկ առանձին շենքում: Ներսում շինված քօրէնը չի լինում շատ խոր և թաղվում է հատակի մեջ կենտրոնական օշախից հետո, պատերից մեկին ավելի մոտիկ, աշխատելով, որ պռունգը լինի մի փոքր վեր ելած, բայց անցուղարձին շխանգարի: Շինողները գլխավորապես փորձված կանայք են: Հօրի մեջ կանգնած՝ նրանք վեր են բարձրացնում քօրէնի կողերը՝ կավե հաստ կլոր շերտեր իրար վրա շարելով և երեսը հարթեցնելով<sup>18</sup>: Քօրէնի ստորին մասն ավելի մեծ տրամագիծ ունի, քան թե պռունգը: Քօրէնի կողի ստորին մասում, հատակի մակերեսին հավասար մի տեղ բացվածք է թողնվում և աղեղնաձև օղակավորվում: Այդ ծակը կոչվում է ֆուրակ, որ ունենում է մոտ 30 սմ բարձրություն և 20 սմ լայնություն: Քուրակից հեռանում է թեք ուղղությամբ մի խողովակ — սո՛ւնդու, որի մյուս ծայրը դուրս է գալիս գետնի երեսը սովորաբար հենց շենքի մեջ, երբեմն էլ շենքից դուրս դեպի սֆարը: Խողովակի այս ելքը օղակավորված է կավե շրջանակով 5—6 սմ հաստությամբ և 15—20 սմ տրամագծով: Դա սո՛ւնդուի ակն է: Սո՛ւնդուի միջոցով միշտ թարմ օդ է մտնում քօրէնը: Երբ կրակը բորբոքվում՝ ածուխի է վերածվում, ակը մի շորով խցանվում է, օդի ներթափանցումը վերջանում է և կրակը քօրէնի մեջ ավելի երկար է պահպանվում: Սա ամբողջ Հայաստանում, Արևելյան Վրաստանում, Ադրբեջանում և առհասարակ Առաջավոր Ասիայում, մինչև Փոքր Ասիայի արևմտյան շրջանները տարածված միջգետնային քօնիրն է իր էական մասերով, բոլոր այդ վայրերում կրկնվող:

Տան մեջ հորած քօրէնը ծառայում է ոչ այնքան հաց թխելու, որչափ ձմեռը կերակուր պատրաստելու և տունը տաքացնելու համար: Ձմեռը նրա վրա դրվում է փայտե ֆո՛ւրսին<sup>19</sup>, աթոռ կամ քառակուսի կարճլիկ սեղան, որի վրա ձգվում է լայն վերմակ, փալաս կամ ջլջիմ: Ընտանիքի բոլոր անդամները նրա շուրջն են նստոտում գետնին փռած թաղիքների կամ կարպետների վրա և ծածկոցի եզրերը ոտների և կրծքերի վրա քաշած՝ տաքանում, կոնակները սենյակի ցուրտ օդի ազդեցությամբ հանձնած: Գիշերն անկողինները այնպես են փռում, որ վերմակներն ամբողջովին մնան ֆո՛ւրսու ծածկոցի տակ<sup>20</sup>: Անցյալում գիշերը հացատօնը լուսավորվում էր ձեթի կանթեղով կամ կավե ճրագով, որը դրվում էր կամ պատի մեջ հատկապես այդ նպատակով թողած խորշում, կամ փայտե ճրագակալի վրա, իսկ ձմեռը՝ ֆո՛ւրսու վրա: Ճրագի մեջ կամ ճարպ էր լինում, կամ ձեթ, կամ Բաքվից ուղտերով բերված սև նավթ: Արդեն վաղուց դրանց դուրս է մղել նավթի լամպը, իսկ այժմ շատ գյուղե-

<sup>18</sup> Տե՛ս վարը՝ «Կավագործություն», էջ 256:

<sup>19</sup> Արաբերեն—kürsü—աթոռ:

<sup>20</sup> Հմմտ. Григоров Н., Село Татев, СМО.МПК, вып. XIII, отд. I, էջ 73—74: